

Frere Alexius y De Trupialen a popularisa 'Aruba Dushi Tera'



ORANJESTAD - Na aña 1951 Rufo Wever y Padu Lampe a sinti e necesidad pa cuminsa conserva locual ta considera ritmonan y melodianan tipico di Aruba. Hunto nan a dicidi di cuminsa graba disco pa lansa riba mercado Antiano. Na 1952 Padu y Rufo a tuma e iniciativa pa conhuntamente bin cu un composicion cu

mester expresa e amor di nos pueblo pa Aruba y cu mester lanta sintimentonan patriotico serca pueblo di Aruba. Den un dia e cancion a keda cla, cual a bira "Aruba Dushi Tera". Danki na "De Trupialen" bou guia di Frere Alexius, e cantica a cuminsa haya popularidad ora a hinca e cancion den repertorio di e grupo. Den un

corto tempo casi tur mucha di scol tabata conoce y por a cant'e; te hasta na ocasionnan oficial di gobierno tabata use. E popularidad di e composicion a haya su climax ora cu riba iniciativa di Frere Alexius, Radio Kelkboom a graba y lansa un disco di Aruba Dushi Tera. E tabata canta dor di "De Trupialen" compana riba piano pa Padu Lampe.

Dia 25 di februari 1976 e comision cu mester a wak si ta na su lugar pa implementa Aruba Dushi Tera como himno a entrega nan recomendacion y dia 16 di maart 1976 Parlamento di Aruba a aproba "Aruba Dushi Tera" como himno oficial di Aruba. Dia 18 di Maart 1976 durante proclamacion oficial di nos himno y bandera Aruba Dushi Tera a resona pa prome biaha oficialmente como himno nacional di Aruba.